

四庫全書

集部

欽定四庫全書

御製文三集

集部

目錄
卷一至二

武英殿纂修原任編修臣吳裕德恭繕校

欽定四庫全書

御製文三集目錄

卷之一

經筵御論

仁者安仁知者利仁

正德利用厚生惟和

天與賢則與賢天與子則與子

剛健篤實輝光日新其德

回也聞一以知十賜也聞一以知二

大禹謨允執厥中

君子思不出其位

唯幾也故能成天下之務

至誠無息不息則久

天聰明自我民聰明天明畏自我民明威

悠遠則博厚博厚則高明

顯諸仁藏諸用

小德川流大德敦化

亶聰明作元后元后作民父母

卷之二

論

論趙簡子齊威王事

伊尹周公諸葛亮論

蘇軾御書頌論

蘇揚論

四得論

四得續論

脩德脩刑論

卷之三

論

慎建儲貳論

說

卞和獻璞說

風馬牛說

圭瑁說

摺圭說

卷之四

說

反蘇軾超然臺記說

復古說

像設說

卜筮說

喇嘛說

十全老人之寶說

卷之五

諭

命諸皇子及樂部大臣定詩經全部樂譜諭
乾隆五十五年八十壽辰普免天下錢糧諭
通飭各省督撫學政嚴禁坊刻經書刪本諭

命普免六十年各省應徵漕糧諭

上丁親詣

文廟釋奠諭

釋奠禮成廣各直省入學額諭

普免嘉慶元年各直省地丁錢糧諭

再舉千叟宴諭

允皇太子率王公大臣等進乾隆六十一年時

憲書備內廷頒賜諭

卷之六

詔

紀元周甲建立皇太子以明年元日授寶為嘉
慶元年詔

訓

命歸政後諸皇子孫曾元輩仍在尚書房讀書
及應用冠服訓

申示皇太子及內外王公大臣等弗允請緩歸

政訓

卷之七

記

重葺盧溝橋記

顏真卿祭姪文藁記

避暑山莊五福五代堂記

四知書屋記

戡定安南復封黎維祁為國王功成班師之記

書安南始末事記

再書安南始末事記

卷之八

記

八徵耄念之寶記

嘉靖玉印記

黑雲室記

正陽橋疏渠記

十全記

卷之九

序

開國方略序

補詠安南戰圖六律序

集石鼓所有文成十章製鼓重刻序

清文繙譯全藏經序

石刻蔣衡書十三經於辟雍序

補詠戰勝廓爾喀之圖序

續纂秘殿珠林石渠寶笈序

卷之十

題辭

王禹偁待漏院記題辭

再題樂律全書

識語

大宛馬識語

臨吳琚尺牘識語

重定元搨石鼓文識語

五代胡瓌番馬圖識語

書命館臣入吳三桂擒桂王由榔諭卷識語

歷年上元鐙詞識語

書後

書宋孝宗賜曾覲書冊後

書韓昌黎答李翊書後

跋

宋高宗書馬和之畫唐風圖跋

重訂熱河考跋

卷之十一

辨

絲竹辨

夢辨

碑文

重脩葛山隆福寺碑記

平定臺灣告成熱河

文廟碑文

勅建永福寺碑記

卷之十二

書事

書宋劉清之紀左傳叔向之母事

書孟子對萬章焚廩浚井事

書光武大破莽兵於昆陽事

勦滅臺灣逆賊生擒林爽文紀事語

卷之十三

書事

福康安奏報生擒莊大田紀事語

書揚雄法言

書晏嬰叔向論齊晉事

書隋文帝改元事

金史紀事本末
目錄
兵部奏凱旋兵丁至京由驛各歸本地營伍紀
事

卷之十四

禕著

讀史

讀洪範

涇清渭濁紀實

筆誤識過

卷之十五

硯銘

宋端石三祝硯銘

舊澄泥夔文壺硯銘

宋端石壁水硯銘

宋澄泥倣唐石渠硯銘

倣唐澄泥螭虎石渠硯銘

錢惟善玉堂硯銘

宋硯銘六首

宋端石方圓規矩硯銘

宋澄泥石函井田硯銘

宋端石雲根紫玉硯銘

宋澄泥伏虎硯銘

宋綠端石龍池硯銘

宋王應鳳紫端石井田硯銘

舊青綠澄泥石渠硯銘

硯銘三首

舊澄泥天祿石渠硯銘

宋端石長宜子孫鑑硯銘

元迺賢五老蜚星硯銘

宋甕硯銘

舊澄泥石渠硯銘

米芾玉堂硯銘

趙宦光做宋澄泥石函硯銘

贊

莊豫德摹貫休補盧楞伽十八應真贊

西番古畫十八應真贊

卷之十六

贊

平定臺灣二十功臣像贊

呢瑪寧波噶布拉贊

古噶布喇供椀贊

西番古德噶布拉贊

平定廓爾喀十五功臣圖贊

右旋白螺贊

欽定四庫全書

御製文三集卷一

經筵御論

仁者安仁知者利仁

安仁利仁朱子解之謂安其仁利於仁蓋引而未發也
雙峰饒氏謂與仁一故曰其仁其者謂已也與仁猶二
故曰於仁於者有間也亦即發之矣然曷不於顏淵子
貢觀之乎予以為顏淵安仁子貢利仁簞食瓢飲回不

改其樂是安仁也。賜不受命而貨殖焉，是利仁也。回之安仁，易知而難行；茲不贅論。若夫賜之不受命，非富貴貧賤之命也。蓋天命之謂性，率性之謂道，率性即安仁也。不受命，即未能安仁也。貨殖者，見有利於仁，如貨殖之生財耳。若謂子貢為貨殖生財之倫，則孟子尚不言利，而謂孔子以是論賜，且與回相提並較乎？史記直以子貢為好廢舉，轉貨賞是誠牟利之為甚矣。其不知孔門之道矣。程子以為子貢之貨殖非豐財，然亦少時事。

至聞性與天道則不為矣然未明言子貢之貨殖為利於仁葉氏則云或者不喻乃謂子貢真好利而亦未明言子貢之利於仁是二子之論胥為近之而於子貢之利仁尚有未達一間者茲故申而明之

正德利用厚生惟和

六府三事皆養民之政而惟修惟和則各有其序有由已有不能由己者焉何言之五行之相克相生皆一定之理洩其過補其不足皆可以由有養民之責者之修

之也若夫三事之正民之德利民之用厚民之生雖由於養民者之和之而和豈易言哉正德在於利用利用在於厚生厚生何在乎在乎使有菽粟如火水耕九餘三或可由善政以致之而時若雨暘綏豐錫屢不可由人力以致之也故惟修可以由已而惟和不能由已必在陰陽之和雨暘以時則此和豈易致哉亦惟祈年慎德飢溺在懷而尤重於察民隱不諱災或庶幾其致和此勸歌勿壞之意乎

天與賢則與賢天與子則與子

天與賢則與賢天與子則與子斯二語也以為答萬章之前問從而為之辭則可以為示後之繼業為萬世法則則不可蓋自啓賢繼業之後但有與子無與賢之事矣其有託與賢而攘竊者皆亂臣賊子之流非唐虞之所謂禪也且

天何言哉與賢與子將命者誰以予論之天視自我民視天聽自我民聽民之所與即天之所與然與子雖為

萬世不易之規而其敗德隳行恃天之與已而不知凜
難謀靡常之義存如保赤子之懷則民必不與之而天
亦厭之而不與斯不大可畏乎紂之言曰我生不有命
在天此豈非恃天之與已乎吾是以祇申難謀靡常之
義而戒負宸者慄慄畏懼以敬天愛民慎守其器而前
此之與子與賢胥不必論後此之與子與賢胥不可恃
故曰斯二言不足以示後之繼業為萬世法則也至於
較年之多少及地之遠近所為愈去愈遠而更甚之乃

曰故仲尼不有天下予又以為斯言也仲尼必不為之
仲尼而為斯言亦非仲尼而已矣蓋孟子嘆王道之不
行萬民之受害未嘗無已欲得天下以施號令行王道
之意然而仲尼無此心也人非孟子更不可有此心也
嗚呼此孔子所以為至聖而孟子祇可稱其亞者乎

剛健篤實輝光日新其德

乾剛健而艮篤實此言各具其用而相資以成其德也
蓋剛健而無篤實或失之躁篤實而無剛健或失之固

躁與固則不能日新其德矣然乾元之體無所不貫八卦之德何一非乾德哉故在大畜言大畜則曰剛健而濟之以篤實以日新其德耳夫日新其德非所謂自強不息乎解大畜者或謂畜之者大或謂能畜其大至於不家食則率謂人君大烹養賢而其臣不食於家予以為家者私也不食於家去私也君與臣胥無私以勅幾協民有不日新而輝光者乎若夫九二為剛中之臣六五為柔中之主此正剛柔相濟不失其養亦日新其德

之道也若必訓二以說其尤戒五以防其惡是君臣之間先自猜貳矣獨占其一爻者或可曲解然非大畜全體養賢之義茲故申而論之

安而后能慮慮而后能得

朱子解此以為靜就心說安就身說夫靜就心說是矣安就身說予以為就意說非就身說也夫不云欲正其心者先誠其意乎蓋靜在心而動在意由靜而動則心正而意誠意誠則安也由是而慮則知致而物格内外

交養本末兼施昏止至善之道也是故正心誠意為聖
經之關鍵心靜不可見意動有所施施出於誠則脩身
齊家治國皆由是而推而明明德於天下矣其所得不
已多乎

明作有功惇大成裕

周公訓成王此二語不惟為政之方抑亦脩身之要也
盖明作乃施為之末惇大則涵養之本施為而不出於
明作則涉暗而終怠矣涵養而不出於惇大則近逸而

寡為矣為學為政內聖外王胥不外乎此至於有功成
裕固其自致之效而非預期於其間也是則周公之意
豈徒訓王以用其舊臣乎

子在齊聞韶三月不知肉味曰不圖為樂之至於
斯也

咸池六英有其名而無其樂非無樂也無其言故不傳
其樂耳若夫舜之韶則自垂千古何以故舜之言垂千
古則樂亦垂千古夫子在齊偶聞之耳必曰在齊始有

韶夫子聞之之後而韶遂絕是豈知樂者哉司馬遷增之以學之二字朱子亦隨而注之則胥未知樂且未知夫子矣蓋言志永言依永和聲舜固自言其韶矣然此數語徒舉其用而未紀其實則又繼之以勅天之命之歌皋陶颺言賡載君臣文倣是非樂乎是非韶乎是非夫子所以感其誠而嘆其極不知肉味者以此乎且夫子天縱之聖何學而不能而必於韶也學之以三月而後能乎蓋三月為一季第言其久耳而朱子且申之以

九十一日知味之說反覆論辨不已吁其去之益遠矣
然予以為夫子不圖為樂之語亦有二義焉至於斯者
至其極也樂之感人為最深而亦有善不善之殊非樂
之罪也在於用之者之人耳樂之善者至其極則惟時
惟幾君明臣良世有不治民有不被其澤者乎樂之不
善者至其極則紂之北里之歌靡靡之舞唐明皇之霓
裳羽衣世有不亂民有不遭其荼毒者乎此夫子垂訓
後世之深意所以有放鄭聲之言也而注書家總未言

及之予故表而出之

子謂韶盡美矣又盡善也謂武盡美矣未盡善也
不圖為樂之義已具前篇茲更以夫子之論舜武以申
夫子之聞韶庶乎其有合於聖人之言樂乎夫樂者何
律聲言志而已無志則無言無言則無聲無聲必無律
依與永則行乎其間而不具體者也是則樂之本在乎
志知在乎志則知舜之盡美善而武之未盡善矣何必
費辭蓋舜性之者也武反之者也舜之勅命時幾何如

其盡美盡善武之度德度義亦盡美矣謂盡善可乎若以聲容節奏論舜武之樂則武去夫子之時已遠而舜更遠矣其聲容節奏必有所失且徒究聲律而舍志與言非知樂者故予謂韶樂至今存以舜賡歌之言證之然則武之未盡善將何以證之曰雅之下武頌之者定是其盡美者也至其未盡善者則夫子反魯定三百之時或者有所刪乎予故申其說如此而要以舍志與言無宮商而泥謂有聲無詩者定乎其非知樂者矣

栽者培之傾者覆之

解是二語者率以栽傾屬之人物培覆屬之天是猶視天與人物為二也予以為天與人物呼吸相通本為一體夫春生夏長非栽者培之乎秋收冬藏非傾者覆之乎四時代運貞下起元天何容心於其間乎哉人與物胥在乾元一氣之中人得其全物得其偏則所謂因材而篤之者也天之栽培傾覆一歲所必有人之栽培傾覆一生所不能無是則栽傾由自取培覆亦由自取惟

當順天之常克己之私或庶幾乎若必求其裁而避其
傾是猶有吉凶禍福之見於其心者吾見其不能如四
時之運矣

天行健君子以自彊不息

此教人以聖希天之法也夫士之去賢聖且遠矣而况
天乎然而不可無希之之志若不希之是自畫也昔為
三希堂記略見斯義且天之行健日日在人目前予以
為較聖賢之去人為尤近耳君子以是為法自彊不息

焉不庶幾可希天乎蓋所謂自亦有二義一曰自己二曰自然自己尚覺有私自然則無為也無為而不息此天之所行健而人之所當以為法也設曰何以不息則注之曰克己復禮

回也聞一以知十賜也聞一以知二

朱子注此以為一與十數之始終一與二數之相對回與賜之高下以是而定夫既云數矣則自一而數至十回將何以歷而知至十哉即二為一之對則所謂始終

正相對之二也且善惡高下是非賓主之類其相對者不可屈指數是賜亦可稱盡知且與回同矣予以為十者上下八方也其數既合其理亦備是回之知舉一而無不知也夫子示曾子吾道一以貫之正謂此也謂回為即始而見終則尚有見者存焉蓋一以貫之無所為知而無不知正可為聞一知十之證賜之聞一知二則實自用其知推測存焉此夫子之所以與其弗如回也若以朱注視之則其所知亦不過賜之流而已其去一

貫之道遠矣未必似曾子之能聞諸夫子也

大禹謨允執厥中

允執厥中乃二帝三王所傳之心法心法即治法也心
蘊內而治施外舍執中無二道也蔡沈注書以為堯之
告舜但曰允執厥中盖取論語之言今堯典內無是語
也然舜之詳言人心道心之公私必當精以察一以守
亦不見堯典也舜之語非堯所授乎精察一守即所謂
執中也其下四海困窮天祿永終後漢苞氏注以為窮

極四海天祿所以長終蓋以為吉言矣而宋朱子注則以為四海之人困窮則君祿亦永絕似以為凶語而予則以為朱子所注得理且非凶語也易曰其亡其亡繫於苞桑為人君者誠念四海民之困窮法文王之視民如傷則必思所以濟民之困窮雖不能博施濟衆而民之困窮者究不無少救亦可保其君祿之善終即洪範九五福之考終命豈不善乎若為君者不思四海之困窮而自恣其樂思欲保天祿之永終得乎因經筵略釋

經義故簡而言之以戒萬世之為君者

按洪範九五福之考終命自來講家皆主壽終之說
予則以為其說未備蓋終者謂終其事非終其壽也
若謂終其壽則人生胥有之事且既終矣何有於五
福舜典言正月上日受終於文祖即始終其事之謂
也堯授舜而堯之事終舜授禹而舜之事終人君受
命於

天能終其事即所謂考終命之福也且以人臣而論受

一職能盡其職復膺遷擢是即能終其所受現在之職也人君能終其事豈非能終其天祿乎至漢儒苞咸注四海困窮天祿永終二語謂為政信執其中則能窮極四海天祿所以長終似有規避之意朱子所解似為凶語然實非凶語也人君自警知懼不自滿假即易所謂其亡其亡繫於苞桑非吉語乎予是以謂之得理為君者長存此四海困窮之念則必敬天愛民孜孜勤政雖以四海之大民物之衆不能家給

人足而物力則常存愛惜偏灾則優予賑恤亦何至
有民不聊生僥焉如不終日之象而兢兢業業守位
聚人天祿可以長終福莫大焉此非遷就苞氏之說
正與洪範所言考終命者互相發明爾因作經筵論
略而未詳茲復申論之

君子思不出其位

此雖曾子重述夫子之言以兼舉艮大象之語然其義
各殊朱傳所引程范均未道及焉蓋不在其位不謀其

政不過盡己之職無越思耳若夫思不出其位則有二
義焉盖位者職也一為不越職一為盡其職不越職猶
易盡其職甚難譬之侍郎不思尚書之職尚書不思大
學士之職易也然平心自問果各能盡其職哉冢宰掌
邦治統百官均四海皆其位中之事司徒掌邦教敷五
典擾兆民皆其位中之事果皆盡職乎為人君者協和
萬邦闢門明目實皆予位中之事也不能身體力行兢
業惶恐之不暇尚何敢有出其位之思哉且出其位亦

更何之乎然而今實有四年後歸政之期則亦所謂過望之思出其位矣然在耄期倦勤者或宜餘不可也

唯幾也故能成天下之務

上章明言極深而研幾極深即所以研幾非二事也蓋深為蘊於中幾乃發於中本祇一原不過微有動靜之別太極動而生陽靜而生陰斯豈有內外先後之殊哉靜所以通志動所以成務此聖人所以闡易理也易之道通天地貫古今自虞翻解此章分屬之著與卦而朱

子遂以易為占卜之書視易小矣其然豈其然哉子之
遲速論中略見之昔用以成功今復以自勉然而見幾
而作克己立誠其難其慎亦惟自知其苦而已敢為侈
談也哉

至誠無息不息則久

此應與易乾象天行健君子以自強不息並觀之蓋不
息即無息而行健亦無息之行也夫何有為於其間哉
然惟天地能之至誠之聖即天地之不息而行健也其

久徵以至博厚高明之用雖由至誠以顯天地仍即天地以印至誠所謂一而二二而一者也朱子以無虛假間斷注之予以為視至誠為小矣試觀天地四時之運有虛假乎有間斷乎至誠之無息亦如是而已矣然而至誠豈易言哉必其致曲之功形而著所謂無虛假也變而化所謂無間斷也則朱子之言未嘗無見但以此注無息之至誠則尚未造至誠之域耳

天聰明自我民聰明天明畏自我民明威

天擇人以為君君奉天以治民治民無他術曰安之而已矣夫以民視天遠矣然而不遠也天聰明自我民聰明天明畏自我民明威所謂至愚而不可欺至弱而不可勝呼吸相通照臨有赫人君畏天當知畏民畏民莫若安民而安民又在愛民其道多矣豈語言所能盡哉惟日孜孜克己復禮或庶幾乎

悠遠則博厚博厚則高明

載物者莫如地覆物者莫如天然天地未嘗自言能覆

載也惟其不言是以終萬古而無不覆無不載至誠之
功用亦如是而已矣夫豈有所謂博厚高明之想乎不
息之誠久徵悠遠胥在是矣然而至誠之明性也自明
之誠教也非生知之聖必當盡思誠之教教豈多乎哉
亦曰無息而已矣其博厚高明之效豈可捨無息而以
意求之乎

顯諸仁藏諸用

顯仁藏用鼓萬物而不與向曾屢言之茲特以顯藏仁

用朱注有所未概者申而論之其自內自外之言吾以
為未臻蓋德之發於外外即內也業必有所本本即內
也其顯與藏內外如一方能合天地萬物為一體豈有
所謂藏於此而顯於彼乎不臻此不足以知陰陽不測
之謂神

小德川流大德敦化

此應與易象所云天行健君子以自強不息並觀之蓋
天地之德無所為大小也以人觀之以錯行代明者為

小以並育並行者為大孰知天之行健以敦化者在不息而錯行代明即在其中且錯代仍一行健之所敦又豈能外行健而別有所謂化者哉朱子注中庸言聖人與天地合德以明天道予以為聖人法天行健原無大小之分而君子法之自強不息不息者誠也未能如聖人與天地合德者皆可以自勉豈可自畫謂不能同錯行代明更謂先識其小後習其大斯則與天地在人心之中以及天地人一體之道去之遠矣

亶聰明作元后元后作民父母

武王此言即申虞舜明目達聰之意也夫聰明非耳目之所能為必如舜濬哲溫恭之德具於內而執兩用中之公施於外則足以作后矣且亶者信也誠也必如是而後可以作元后作民父母洪範所云作威作福亦如是而已矣且聰明出於誠信然後可謂之聰明若作聰明而不出於誠信必有偏私亂章之事又何以作元后以臨民哉

御製文三集卷一

欽定四庫全書

御製文三集卷二

論

論趙簡子齊威王事

近書向所題養正圖解以向所題語猶有未臻者茲故
申而論之

夫此二事讀書者所咸知亦咸以為英舉者雖然藥激
阿大夫非簡子與威王所用者乎進過求譽者固有罪

則用而聽其進受其求者獨無罪乎而沈之河烹之鼎亦所謂牽牛蹊人之田而奪之牛罰亦重矣蓋簡子威王以為必如是然後可卸已過邀人譽而置人命於不問斯亦狠矣斯亦不足譽而已矣

伊尹周公諸葛亮論

輔少主而能格其非終成令辟者伊周尚矣諸葛亮有伊周之能而未成其志斯可哀焉是以叙而論之夫千古之君孰非受

天之祿者哉然錫祿在

天而能否承之則在為君之人不惟其人之身尚視其祖宗之所以基命宥密治保邦之深淺有以荷鴻庥而垂永祚如太甲成王是矣太甲去湯弗遠成王去文武亦弗遠成湯文武之澤未斬也是以伊尹幽王復辟克終厥德然孟子已云有伊尹之志則可無伊尹之志則篡矣若夫成王之過未如太甲三叔流言起自近親周公天子之叔衆所仰望若如伊尹營宮之事則天下

歸心成王不得為王矣周公豈肯出此亦惟有避之而已不忍為伊尹之為也孟子所云周公之不有天下猶益之於夏伊尹之於殷蓋求其說而不得強為之辭並伊尹之志亦失之矣終以雷電示警親迎公歸稱守成之令主者首數成王非周公之德有以感天而格王乎且成康之後今何在焉而元聖之祀千載東魯其百倍之勝於有天下者為何若子獨惜夫諸葛亮之有伊尹之能而未成其志遇劉禪之昏足以亡漢則亦有說焉

蓋光武明章之德不及成湯文武遠矣不惟五世而斬而又加之以桓靈之殄德

天之厭漢久矣諸葛亮一人其能挽漢已隳之運哉且其時外有強隣自救之不暇使亮而為伊尹之事蜀中先自亂安能尚存乎予讀出師二表實矜亮之心且憐亮之不能為伊尹之事而終於責為人君者當識

天難謀命靡常兢兢業業以永保其祖宗之基或庶幾乎

蘇軾御書頌論

蘇軾此頌蓋因仁宗為太子時書賜張士遜而作也其文其書固美而其事則有大謬者是以叙而論之

夫太子者儲貳之君易所謂潛龍勿用也茲公然曰寅亮天地弼予一人又曰日新其德夫日新其德猶可寅亮天地弼予一人則真天子也將置其父於何地且仁宗固為天子矣士遜亦為丞相矣即位之後書以賜之則可未即位不可為此言亦不當存此心也夫蘇軾固

通古今達時務之人幸其時無江充李林甫之流設有
之則太子危矣尚何德之可頌而軾乃頌之乎然考仁
宗以十二歲即位則在東宮時甫十歲十一之間亦不
能知此文義書以賜人若果知此文義出於自為則是
志大言侈昧勿用之理更為不當其即位之後必大有
更張見長之事仁宗無之也蓋仁宗不過溫柔忠厚之
人亦不能為此予以為此事出於士遜之偽為欲以榮
耀眩世彼固依違曹利用之流耳但考軾為此頌乃因

士遜之曾孫欽臣之請作於元豐七年去仁宗時六十餘年矣其真其偽皆不可知抑亦如昌黎諛墓之為乎是以君子立言不可不慎也

蘇揚論

蘇武留匈奴十九歲而還揚重英留緬甸二十一年而還念其事相類作蘇揚論

武在匈奴餐旃齧雪勢不能久向已有說然其娶妻生子漢書章章可考重英在緬甸其誓死不降與武同而

無武娶妻生子事今呼路人而詢之曰重英與武孰優
必甲武而乙重英彼故不知武之為何如人何如事徒
以羶薶久而耳食熟耳則司馬遷所云非附青雲之士
惡能施於後世語誠不與緬甸之歸順也總督富綱猶
責其弗獻重英子以為過於羅索既而其長隨以重英
及其時被遮之兵並自暹羅所獲粵民致之邊及入邊
重英謂同歸之兵曰今生還本朝即伏國法亦瞑目是
可哀矣問其在緬有無易衣娶妻生子事則皆以為無

而重英本抱病來因遂故以其志可憐憫命給道員銜
仍將錄其子夫重英究為在緬偷生茲仍加薄恩所為
仁義兼施教忠之道也若武之為典屬國漢之恩為過
優矣而猶有嘆其被賚薄者是何耶且以重英所為較
武有過之無不及武乃奉使而重英則不過從軍被拘
留也若曰因附青雲而得名之傳則其傳與不傳固不
足為貴耳

四得論

昨自避暑山莊迴至御園之作有慙愧德無稱四得之
句蓋引而未發茲乃敘而論之

夫子思引孔子之言以為位祿名壽胥因德而得之則
知有德而得之者為實無德而得之者為虛若予無其
實而得其虛其慙愧可勝言哉蓋予之位

天地之所命

祖宗之所授無是二者予因何而得之亦惟粟粟危懼
慮鰥厥官遑敢自詡其得以傲物哉至於祿則九寓所

同仰萬民所共奉豈啻十目十手之視指哉豪釐之失
謬以千里威福玉食一涉私欲之作必致越其始而隕
厥終能常保其得乎若夫名為實之賓實則賓之主也
居九重之上臨百辟之尊孰不以虛言譽之即今八旬
大慶之獻詞頌者不可僂指數則此名也豈其實乎雖
文治武功微有實蹟之可稱然無一不由兢兢業業中
所出且恐具其始而失其終得將不保敢自怡乎茲逮
八旬不可不謂之壽然此壽乃

天地默佑

祖宗延禧予一人幸逢其會敢強顏以為有所致哉且予五十五年之間無一日因微疾而不理事者求仙素所鄙即醫理並不識亦惟慎起居節飲食以為養生之常道耳則又有何術之可得凡此四者皆予所得而實皆非德之所致也非德之所致則所謂有其名而無其實忸怩之不暇又何能肆然自居而不疑方將慎半九十之懼孜孜矻矻以待五年之歸政可稱全人則惟敬

待

天恩而不敢或必者耳著論自警並以示羣臣之獻詞
頌者

四得續論

近作四得之論非自謙也蓋紀身之鮮實德與己之所
實見耳然尚有未盡意者前論切乎已續論公天下抑
亦有所獨重者耳

蓋中庸第十七章子曰至子孫保之而止所以戒為天

子者保其位而已此皆夫子之言其下四得之譯意謂
子思之語非夫子之語也以位言之易曰君子思不出
其位則君子之位也又曰聖人之大寶曰位則聖人之
位也豈必曰天子之位乎堯舜禹有天子之德可謂得
天子之位其餘皆不可謂得天子之位孔夫子有聖人
之德可謂得聖人之位其餘皆不可謂得聖人之位也
孟子所云故益伊尹周公不有天下其心未嘗不羨天
子之位雖欲行其道之意耶然非至言也蓋益得益之

位伊尹得伊尹之位周公得周公之位非不得也若孔子必無是語而朱子注子思此章直以為必受命為天子是亦孟子之遺意耳予以為後世之亂臣賊子未必非此言有以啓之然此言非予言之他人不敢言也且自古至今無一代無天子是皆得其位者乎予不敢以得位自居實因德不勝而滋懼耳至於祿則自天子以至百辟卿士皆食祿者也盡其職乃可謂之得鰥厥官不可謂之得而其本均不出於修德也王禹偁待漏院

之記微見其端矣若夫名乃實之賓實者德之謂也無其實而有其名不滋愧乎三代以下惟恐不好名予謂此語亦未臻而清流操室中之戈者非因名有以害之乎壽則秉來之氣數所不可強盜蹠壽而顏淵夭盜蹠果得壽乎顏淵果不得壽乎古來盡節以終者謂之不能得保其壽可乎茲故申而論之以戒後世之不務脩其德而徒慕四得以反致敗其德且以靖天下後世之託聖賢之書以妄興其欲有所得之位之心有位與無

位之人可不深思所以自處哉

作是論時引用繫辭聖人之大寶曰位蓋亦斷章取義耳予之意則以天子有天子之位聖人有聖人之位分而言之然亦非始予意也蓋中庸上節孔子之言德為聖人尊為天子已區而二之矣既而思之繫辭本文下即繼以何以守位曰仁何以聚人曰財理財正辭禁民為非曰義是則天子之事也似繫辭所指聖人即天子也然按諸經從無尊當時天子為聖

人如後代所稱聖君聖主聖上者大禹謨乃聖乃神
為益對舜稱堯之辭微子之命克齊聖廣淵為成王
對微子稱湯之詞皆非稱當時天子也三代上君臣
之際情親而語質無取乎頌語惟莊子華封人祝堯
使聖人壽使聖人富使聖人多男子為當時語堯固
聖人也然則稱天子為聖人起於周秦之間亦如朕
之字專為天子自稱乃昉自秦也十翼為孔子作不
應繫辭有是語且上繫第十一章莫大乎富貴莫大

乎聖人又分著矣歐陽脩以擇之不精繁衍叢脞近於戰國後語疑十翼為雜取後世講師之說非孔子所作亦不為無見論成偶思及此并按於後

脩德脩刑論

管子曰日食修德月食修刑斯言也千古以為至論而子則以為未臻何言之為人君者無時無刻無不宜修德與修刑必待日月之變而後修之不已遠乎設道其辭曰日者陽之屬遇變則更宜修德月者陰之屬遇變

則更宜修刑不知日變恒少月變恒多

日行一歲一周
天月行一月一

周天日月近交則食雖入交而非朔望則同緯而不同
經當朔望而不入交則同經而不同緯皆無食必經緯
同度而後食月行速與日近交次數較多故月食多於
是有一歲兩食者日行遲與月近交次數較少故日食
少於是月有隔數歲一食者
此求日月食一定之法也或隔數歲或隔數月遇其時
更當修之不過其時可以不修乎且視德與刑為二事
君之修也有可急可緩之時是大不然矣



御製文三集卷二

欽定四庫全書

御製文集部
文三集卷
三五至

欽定四庫全書

御製文三集卷三

論

慎建儲貳論

予踐阼默禱之事言之屢矣茲仰沐

昊慈克符初願因十月朔例應頒時憲書特於九月初
吉宣立皇太子用昭付託前此不立儲嗣之由亦節經
降旨申明至為詳盡夫建儲立嫡三代以下無不遵行

朕讀書稽古豈於此名正言順之事輕議其非昔我
聖祖仁皇帝曾以嫡立理密親王為皇太子並特選正
人輔導如湯斌徐元夢皆係公正大臣非不盡心匡弼
乃竟為宵小誘惑不能恪共子職終致廢斥後遂不復
冊立夫以堯舜之聖而有丹朱商均之子可見氣稟不
齊即聖君而無嚴父日以敬天法祖勤政愛民面命耳
提尚難期其遷善改過孟子所謂父子之間不責善蓋
實有見於此何況一二輔翊之臣安能格其非心變化

氣質乎是則繼體象賢惟賴

天心眷佑篤生哲嗣及嗣子之能承受與否耳予自即位後亦何嘗不欲立嫡嗣初以皇次子為孝賢皇后所生循照雍正初年

皇考親書朕名緘貯乾清宮正大光明匾上之例亦將其名親書密緘匾上不意其早年無祿曾同大臣等啓緘閱看贈為端慧皇太子後以皇七子亦係孝賢皇后所生原擬書名緘貯因其年未長成遲而未果旋亦早

世嗣於癸巳年

南郊大祀敬以所定嗣位皇子之名禱於

上帝並於盛京恭謁

祖陵時敬告

太祖

太宗在天之鑒是朕雖不明立儲嗣而於宗祏大計實
早為籌定特不效前代之預行冊立務虛名而無實益
耳今荷

天恩申錫周甲紀元壽躋八旬開五計丙辰歸政不過
數月始將密緘嗣子之名召對皇子皇孫王公大臣等
公同閱看宣布諭旨明示中外來歲大廷親授錫慶延
釐實從來史冊所未有若未經頒旨以前設臣工中或
有建議立儲者其人必非真懷忠愛不過託為讜論陽
附正人君子之列實則冀徼後福陰為夤緣干進之階
非為名即為利而名利兩收終歸為利者多似此莠言
亂政之人自當立予重辟然國家儲副極非小事彼既

託為正言而抵之罪究非美舉今朕躬行上儀親為付
畀中外翕然臚歡交慶皇太子體度端凝仁孝夙著克
肩負荷新正授受之間實為盡善盡美天下後世公論
以朕為戀位乎不戀位乎設朕於此稍有不欲歸政之
心又何妨不行此典且皇太子及內外大臣皆具摺籲
請至期頓始行歸政情詞懇摯出於至誠朕亦何難俯
俞所請乃朕於御極初年即以紀年六十傳位嗣子之
意齋心默禱近年屢於諭旨內諄諄述及是朕籲

天歸政之語不肯繫戀天位之心

上帝鑒之天下臣民亦無不共見之今賴

昊蒼默佑諸吉備臻欣慶之餘實深欽感迴念

聖祖大漸授位

皇考其時係內大臣隆科多宣傳

顧命逮

皇考傳位朕躬宣示密緘倉猝之際朕不敢自行啓封
召同大學士鄂爾泰張廷玉當面展緘敬閱茲朕躬身

大年懋膺多福明頒詔旨親御殿廷付授神器以今視
昔吉祥善事孰逾於此此實

上天保佑申命有加無已之

洪貺朕今壽望九秩精神康健視聽未衰若來歲歸政
遽思自暇自逸竟置天下重務於不問則非所以敬承
天眷亦非御極初年定期歸政不肯戀位之初心矣夫
天下至大神器至重儲副之寄運祚所關方今綱紀肅
清外無攬權怙勢之臣內無婦寺偏寵之事朕親裁庶

政鉅細無遺宮中府中皆為一體雖不明詔立儲實無
絲豪流弊若如前代權奸柄國女謁公行黨援門戶秕
政百端而書生迂見惟斷斷然爭持國本之論甚至君
臣父子不免猜疑如前史所載唐宣宗時裴休請立太
子帝云若立太子則朕遂為閒人宋太宗因太子廟見
還宮都人擁道喜躍帝聞之不懌曰人心遽屬太子欲
置我於何地又明神宗因挺擊一事召文武諸臣責以
間離父子因執太子手謂諸臣曰此兒極孝朕極愛惜

使朕有別意何不早更置等語此由唐宋諸君繫戀天位以神器為私靳而不予而明神宗又因內寵固結覬覦非分以致盈廷聚訟骨肉生嫌前事具在可為殷鑒我朝

家法相承乾綱獨斷惟期慎簡元良從不稍存私愛而朕紹承統緒首以付託得人為重無一豪繫戀天位之心無一息非疑承

帝命之念用能默通呼吸感召庶嘉實朕御極以來六

十年如一日也總之儲貳一建其弊叢生不特僉壬依附易啓嫌隙而名分早著日久必致流於驕佚而不知我國家不明詔立儲燕翼

貽謀慮至深遠即緘名密貯務當慎之又慎不可預為宣露如朕現在舉行歸政亦必俟為期至近始行頒旨宣示此實萬年無弊之法我世世子孫若能敬效

祖宗及朕之用人行政於以欽承

昊眷祇迓

鴻庥亦如朕之躬躋上壽再立太子踵行歸政典禮禔福延洪用昭億萬禩無疆之慶此朕所深望於方來者也特將始末緣由再行申諭此旨著於尚書房內閣軍機處各鈔錄一通敬謹存記永為法守

說

卞和獻璞說

或問卞和獻璞之事為有乎為無乎曰無何以見之曰以今和聞之玉見之和聞之玉有二一曰山玉取之山

一曰水玉取之水取之山者其質大或至八九尺然間
雜石性者有之取之水者其質小至大者不過尺餘光瑩
弗雜石性蓋受水性潤故也故恒以水玉為良此歷年
貢自和闐人所共知者若和氏所獻應為良玉必出自
水者既無雜石性之理安用玉人相之以為非玉兩被
別繼之哭以血而始明其為良玉哉此之誤必在璞之
說矣蓋玉未治為璞見玉篇或山玉之雜石性者而決非
良玉之產水中者也亦決非璞包玉不見必待剖而後

知其為玉也若玉皆有璞包之必待剖而後得則今和
闡之玉多無萬誰為一一剖之乎此不待辨而知玉之
不在璞中必待識者剖之而後得也且卞和之目亦與
人同耳玉人攻玉久矣豈不能識玉而和識之即以為誑
其罪亦不至一再刖足也夫以雜石性未治之璞去其
石性理而為璧亦恒事耳奚至艷稱千古乎蓋韓非自
嘆已之不遇時人之不識已設為此謬悠之說以自喻
耳然非非不明敏達時務者觀其說難之文反覆論辨

曲盡人情既達時務盡人情則應薄世高蹈以全其真
又何必為此謬悠之喻以惑後世乎余故曰無此事也

風馬牛說

齊桓伐楚楚子使與師言唯是風馬牛不相及孔穎達
正義注以為風放也牝牡相誘謂之風嗟夫是何言耶
直以淫俗語誣經傳且於齊楚之遠不相及何涉引尚
書以為證其去益遠蓋乾為馬馬性剛坤為牛牛性柔
馬性剛故其立與馳悉迎風牛性柔故其立與馳悉順

風一迎風一順風是不相及也注疏家本不曾習見馬牛之性不得其辭遂引尚書馬牛風逸為之說而不知其逸正所謂迎風順風之不相及也偶閱左傳故申其說如是及博閱諸書見宋俞琰席上腐談頗於予意有相合故並載之

俞琰席上腐談曰牛順物乘順風而行則順馬健物逆逆風而行則健書費誓云馬牛其風春秋左氏傳云風馬牛不相及蓋馬牛奔逸則各自從風而行也

圭瑁說

圭之名見於夏書之禹錫瑁之名見於周書之王受權
輿於此而虞書之輯五瑞並未明言其圭之名各別及
其短長與瑁底之邪圓也注疏之家多耳食口傳愈晰
愈不明曰近曰更遠予近為石刻十三經序以為以注
疏解經不如以經解經者以此也夫虞至周周至漢率

數千百年其唐宋更無論矣後人據圖作圭

自鄭康成
遂於禮學

始圖三禮厥後阮誥夏侯伏明張鑑梁正楊傑俱有三
禮圖至宋初尚有存者聶崇義採諸家之說為三禮圖

現入四庫全書今玉圭流傳於世者甚多宋製者皆在
聶崇義之後即漢器亦不過因鄭圖而倣成之非必係
三代時已屬屬鼎而瑁則雖有圖三禮圖六經圖玉海
古物也中俱有瑁圖畫作而
式近馬驢作釋史其瑞玉圖則依孔安國書傳邪刻之
說作四式說禮家已屬參差俱不過臆為之即偽據圖
作瑁亦未見其器也並偽作其器者亦無也今據其可考者言之

鄭康成云

鄭康成周禮注名玉曰瑁者言德能覆蓋天
下也蓋瑁古字作曰易繫辭冒天下之道書

君爽丕冒海隅出日詩邶風下上是冒皆取覆冒之義
雖不言其制而其理為近向所纂三禮義疏中正義條

曾引其說名玉曰瑁者言德能覆天下此猶近理而賈公彥

曰見則覆之以齊瑞信

賈公彥周禮考工記玉人疏古
者圭必有冒言不敢專達之義

天子執冒以朝諸侯見則覆之又言冒所以冒諸侯圭以齊瑞信方四寸邪刻之云云前說出尚書大傳後說出孔安國書傳向定周官義疏存疑條下載此亦因其說持之者多故未之廢其實未足為據也 馬端

臨遂增之曰有不同者即辨其偽

馬端臨文獻通考王禮門引舜典下注云

諸侯來朝天子以刻處冒其圭首有不同者即辨其偽乃沿孔穎達尚書疏之文

夫諸侯既受

圭於天子焉能有偽更訛其傳以為有過者留之三年

六年九年之說此不過竊孟子一不朝則貶其爵云云

之語

尚書大傳冒圭者天子所與諸侯為瑞也無過行者得復其圭以歸其國有過行者留其圭能改過

者復其圭三年圭不復則少黜以爵六年圭不復少黜以地九年圭不復而地畢云云端臨彙括其說又引程

大昌演繁露舜典謂輯五瑞即此執圭而朝者輯者斂而
上乎天子也又謂班瑞於羣后即此復與其圭以歸
者也第有過留之三年不見所出予意所謂留之三年
六年九年者不過剝孟子緒餘而端臨以為大傳此言
極有理乃寡夫不朝是其罪也留圭而不許來朝復以
識之尤者

六年三年為別其間有何罪乎真成讜語矣又王措大

圭祭天其圭長三尺

周禮典瑞王晉大圭執鎮圭繅藉五采五就以朝日宋陸佃曰王執

鎮圭以祀天以朝日以饗先王王十朋周禮詳說明王應電周禮傳並於朝日之下注云言朝日則郊天可知按考工記大圭長三尺寸上終葵首天子服之鄭康成注王所措大圭也惟既曰措又曰執未知一時並用與否宋林希逸考工記解曰措一而又執一非尊者所宜云云則古人亦計及措圭之未便矣

夫玉至

三尺重物也古之帶最寬鬆不似今時帶之緊束搯重物於腰間必至落地反不成敬且天子祇雙手既搯大圭又執鎮圭以祭其於獻奠之際將何以行禮權付旁人持之更非所以示威儀也圭之說既明則瑁之形之制可想而知不過寓意覆冒天下而已然總以德為要

德不能冒無其器實可有其器適足增愧

瑁之形制既不可考以冒

圭首辨詐偽其說更不可信至取義於以德覆冒天下則古聖人精義不在乎制器而在乎慎德若有其德即不執瑁亦可若無其德雖日執四寸之玉對之適足增慚而已更有因圭首有邪有圓

之殊而圖其形者

諸國瑁下圓刻邪刻之不同總惑於以冒圭首之說公侯伯之圭有瑁以

辨其偽而子男之璧即無庸辨其偽乎且三等之圭共此一瑁雖有詐偽焉從而辨而璧徑五寸輪廓正圓又安能以四寸之瑁冒之況舜典有輯瑞而無執瑁之文周禮春官典瑞亦不言瑁考工記玉人所載鎮圭以下十餘器與典瑞相合而獨惟言瑁之書後出亦殊不足信總之數千載之下必欲銖計刊度數千載以上之物愈致膠鞣杳鑿而已遂有瑁底圓缺邪缺之異實為入海算沙將何適從不值一喙矣暇著是說以杜千古之嚮口

搢圭說

圭瑁之說既明則搢圭之說應繼蓋搢者插也以大圭

之重插於寬衣博帶之間必致落地前說已詳茲復閱考工記又有中必之說鄭康成以為約其中央乃博會以繩繫之不令墮地之義耳即使約之腰間亦礙所謂

周旋中禮之度也因命翰臣博稽唐宋以來之制則自

唐至明五代禮儀志皆有搢大圭執鎮圭之文

五代之制因列

書於後以備考

夫唐宋明漢人也嚴其漢儀且不必論至於金

則我滿洲何必嚴其課且尚偏安亦覺僭矣元實蒙古將以其一統中華而謬為嚴漢之舉耶然予總以為其

事涉虛誣未必實有也何言之夫名以物徵物以實証
唐宋金元遠矣明則本朝所繼統者郊祀重器不藏於
內府則藏於太常猶憶乾隆初間曾命太常查舊庫物
得蒼璧四黃琮一命貯之乾清宮至今存無所謂大圭
鎮圭也遍查內庫亦無此二器然則明時皇帝所措之
執之者為何物耶以為流賊之亂被擄掠失之乎夫流
賊賊也所重者金銀圭璧不值其擄掠且太常寺庫之
舊璧琮具在而獨無大圭鎮圭亦其一証即果失之其

器必在人間國朝百五十年太平天下其器早出世市當有人售之以為貢獻之物矣則知唐宋以來之禮志率出虛文無實事耳然予之意更有所切要於是事者不可不明言也唐宋明無論矣金元乃襲漢之謬且未必實有其事則何為耶惟本朝獨無此事後世迂儒必有議本朝之荒略者試讀此文則知措圭執圭之合禮與不合禮祀

天之在敬德與不在大圭及鎮圭矣且大圭長至三尺

出周禮冬官考工記玉人不易得也今臣和闐乃易得唐宋金元明

何以得之若謂必措大圭執鎮圭以申祀然後中禮獲宥則本朝無是禮而

四朝繩繼九寓又安擴宇拓疆中外臣服蒙

天貺為獨厚遠勝彼五代

謂唐宋金元明

斯亦薄海所共知也

是知總在敬德而不在器名不正則言不順亦夫子之志也予之子孫其尚思所以務實哉

周禮考工記天子圭中必鄭康成讀必為緝謂以組

約其中央

按此祇言有組而不詳搢法

唐開元禮祀昊天上帝皇帝至中壝門搢大圭執鎮

圭升壇搢鎮圭禮畢出中壝門殿中監受鎮圭大圭

按唐書輿服志亦不詳搢圭用繹之制

宋政和五禮祀昊天上帝皇帝至中壝門外執大圭

盥手搢大圭盥畢執大圭升壇搢大圭執鎮圭至神

位奠鎮圭執犬圭俛伏興又搢大圭詣太祖神位執

大圭宋史輿服志仿大圭中必之制製約圭繹藉搢

之紳帶之間政和二年宦者譚稹獻古元圭長尺二

寸中一小好可容指為受組之地

按此亦圭中有好穿組指之紳帶之

間

大金集禮祀昊天上帝皇帝至中壝門執大圭盥手

搯大圭盥訖執大圭至壇上搯大圭執鎮圭至座跪

奠鎮圭訖執大圭進玉幣搯大圭奠訖執大圭還次

釋大圭又進饌搯大圭者四

按此不言搯法

元史祭祀志祀昊天上帝皇帝至西壝門外執大圭

就小次釋圭出次執大圭盥手搯大圭盥訖執大圭
至壇上搯大圭執鎮圭至神位奠鎮圭奠訖執大圭
還次釋大圭又進饌搯大圭者四

按此亦不言搯法

明史禮志郊祀皇帝搯圭者六一盥手二上香奠玉
帛三奠俎四滌爵五上香奠爵六飲福受胙輿服志
玉圭長一尺二寸刻其上刻山四以象四鎮之山以
黃綺約其下以囊緇之

按此無大圭鎮圭之分其搯圭用囊

御製文三集卷三

欽定四庫全書

御製文三集卷四

說

反蘇軾超然臺記說

蘇東坡超然臺記千古竒文也而予反其意其亦有說乎蓋此記之語以遊於物之外為最要而予政以此語為未臻夫天地大矣而人立乎其間以配之人之在天地之間大而言不啻恒河之一沙小而言不啻太倉之

一粟然人能配天地者豈不以一心乎而一心之在一身又不啻一沙一粟矣夫此一心在內乎在外乎遊於物之外者目而已目更心之所使孟子所謂萬物備於我非備於身乃備於心且遊於物外者物以萬稱豈能一一窮其理天地亦物也孰能遊其外乎况內本也外末也遊其外不遊其內是捨本而逐末捨本逐末爭民施奪其為物有以蓋之

用蘇軾
記中語

不已甚乎故予以為應

遊於物之內者謂遊於心也天地我心萬物亦我心也

心一而已矣無殊無同無人無我而要之亦無所謂遊
夫如是則天地萬物一氣一理又何用其放肆志無
所往而不樂哉六齡讀大學稍識正心之本長而見東
坡此篇喜其識高而詞雄茲耄耄矣乃悟雄高之無用
不如求正心之本以會天地萬物為一體勤學七十年
然後為反東坡此篇之文以待後之勤學者反予此篇
之文也

復古說

予近作圭瑁及措圭之說亦既申論史家謬傳之不足信與古之不易復矣然圭瑁不過禮器之一端無關國之大政與禮之要義也禮之一端不易復古無所綦繫若夫大政要義益關天理民生之正道實不可復古者今雖無思復古之人恐後之迂而泥古者陷於耳食口傳之窳尚有思復之說故為是論以明之

夫所謂國之大政者井田封建及公尸之說是也井田之說董仲舒已知其難封建之說柳宗元論之最悉且

自秦漢至今卒無行者其或行之無不立敗

見漢與明

茲不

贅論若夫公尸之說最為失義非正道自周末已不行徒以其類於孝竟無人敢議及而朱子方以為氣與質合散者復聚乃為教之至彼明理之人也亦為是謬論問彼曾行之乎否乎況以已之子為父尸而拜之斯為顛倒彛倫之甚與兒戲何異且其子為三四歲無知識者耶著以衣冠而坐之位彼且哭泣跳仆不成儀矣為七八歲略有知識者耶善性者必不自安惡性者將嬉

戲恣食或以其父為宜拜已者有之將不用其子乎則其弟其姪非其父之子之孫乎設以遠族叔伯之子孫用之則益遠矣與氣脉相屬有何關涉然此尚以一家言之若夫宗廟昭穆之序不止一人將何以行之止為一室立尸乎抑各室皆為之立尸乎扞格不通有所必然而大小雅公尸皇尸竟公然以為宗廟大典不誠可笑乎夫此猶託於氣脉相關之說而曲禮蓋已知其不可行遂曲為卜筮之說

曲禮為人子者祭祀不為尸鄭康成注尸者尊者之處為其失

子道則尸卜筮無父者孔穎達疏尸代尊者人子不為也。是曲禮亦知其不可行而鄭康成乃曲為卜筮無父之說率皆遷就泥古乖正理耳。大族人多尚可小族人少將何以行之。至白虎通竟云周

公祭太山用召公石渠論謂周公祭天用太公此誠讖語不已褻瀆神明而誣周公大失禮乎。孔子曰祭如在祭神如神在不曾言尸也。夫此褻瀆大失禮之事而以訛傳訛傳會辯論不已載之經史傳之千古而總無實據乃後人無敢言其非者豈不以其謬託隣於孝乎。孝詐可以偽為哉。漢之賈董唐之韓柳宋之歐蘇皆明理

之人善於論古而皆未言及此余而不言實自慙為不讀書不明理矣遂不顧橫去聲議敘而論之

像設說

公尸之非禮既明則像設可以申其說焉至詩稱公尸嘉告鄭箋一以為公尸以善言告之是謂言出於公尸

矣

詩大雅既醉篇公尸嘉告鄭箋公尸以善言告之是通篇皆當為公尸之言公尸以少者為之則其言不

能自為設教之一言益不成事一以為公尸嘉告謂嘏辭也似又出於

祝史

孔穎達註云尸告主人唯嘏辭耳故知公尸嘉告為嘏辭也此即楚茨詩工祝致告鄭箋所謂以神

意告主人使受嘏之說也二
語皆出於鄭已自相矛盾然既明尸之非禮則其嘉

告乃緒餘可以弗論茲特論像設之義云

像設之義余以為賢於公尸何言之蓋像者金木土皆
可為之金木土則無知者也公尸者以人為之人則有
知者也以有知肖有知彼亦一知也此亦一知也如水
之與火其能合一乎以無知肖有知則其所祭有知之
靈或附於無知之像設而享其祭尚可謂之求於慌忽
思慕優閒愾見耳然總不如神板書位之為得正相傳

像設之說謂始於離騷楚辭章句宋玉招魂云像設君室玉逸註為君造設第室法像

此不然也孔子觀明堂見堯舜桀紂之象或謂出於家

語之傳會越句踐以金鑄范蠡則實出於宋玉之前也

自離騷有像設君室之文後人遂謂設像始於戰國時其言未足為據家語曰孔子觀於明堂觀四門墉有堯舜之容桀紂之象此與后稷廟堂三織之金人相類馬昭諸儒謂家語一書乃王肅傳會而成固難盡信然吳越春秋紀越王使良工鑄金象范蠡之形國語亦云越王命良金寫蠡之狀而朝禮之足為確鑿可據則設像春秋時已有之諸家入主出奴各是其是之說祇可以

理度之而不可以竒信之若夫國學

孔子之神位書板自合

聖人之正道而

闕里之塑像亦所謂有其舉之不可廢

孔子設像始自漢文翁石室唐

開元後乃有塑像雖不如開元釋奠禮臨時設位之得正然朱子答錢子言白鹿洞塑像書但辯席地趺跪亦不言塑像之非今國學孔子位設神牌而闕里之有塑像亦惟有舉不廢云爾然亦頗合吾

所謂以無知肖有知之義或致

憑依受享乎是為說

卜筮說

圭璋封建井田以及公尸像設之說既陳則卜筮亦有類於是者不可不申其義而為之說

夫以上六事余可以直指其非理不可行而卜筮則古聖人所以幽贊尚占開物成務之為奚敢輕措之辭然而古今異宜能行與不能行亦不可以不辯何則今之時非古之時今之人非古之人也洪範曰擇建立卜筮人乃命卜筮蓋古時必有習卜筮者讀其書通其法今其書其法何在而讀而通之者又何在且讀之通之之

中尚當擇而建立之其亦難矣夫所謂擇者必擇其明
通公溥無適無莫之人使其卜以靈龜筮以神著然後
能通天地愜鬼神定吉凶居今之世能得向之所謂乎
如漢之京房唐之李淳風宋之邵雍明之劉基或類其
人矣而間聲去世一出且無靈龜與神著安可以卜筮況
三人占則從二人之言是其間有疑焉以有疑定問疑
謂問所疑原無一準故余不敢云古聖人卜筮之說為
之事也無而實謂今之無卜筮之人與其器謂靈龜則亦可無

卜筮之事也且舜之命禹曰卜不習吉可知古之時已
有不用者矣至於盤庚之卜稽大誥之卜陳所謂世治
聽人世亂聽神神道設教以安衆志耳豈如大舜之志
先定而詢僉同哉且國家大事動資卜筮以定吉凶則
言吉凶者紛至將何適從豈不同待議論定而敵兵早

過河乎

即如去歲廓爾喀賊匪侵擾至後藏扎什倫布
有濟仲喇嘛羅卜藏丹巴者於吉祥天母前占

卜妄稱不可與賊打仗以致衆心搖惑并將派出堵禦
賊匪之各喇嘛番衆全行撤散於是賊匪毫無畏忌遂
至廟中搶掠金銀供器及塔上鑲嵌松石珊瑚等物因
令鄂輝查明後即將羅卜藏丹巴剝黃正法既令衆番

知予保護黃教若遇教中敗類亦必明正典刑不似元季之過於崇奉轉成虐政亦以示占卜一道適足惑亂衆心不可不加懲誡耳 茲故明言卜筮不能行於今而以大舜不

習吉之言為準然舜豈無所本哉濬哲文明溫恭允塞具此德則通天地愜神明動罔不吉又何卜筮之足藉乎

近作數篇似有意與古論異然胥非新奇可喜之言而皆平易據理之論聊附書之以待後世通儒之究正耳

喇嘛說

佛法始自天竺

即厄納特珂克部其地曰痕都斯坦

東流而至西番

即唐古特

部其地白三藏

其番僧又相傳稱為喇嘛喇嘛之字漢書不載

元明史中或訛書為刺馬

陶宗儀輟耕錄載元時稱帝師為喇下請作拉馬毛奇齡明武

宗外紀又作刺麻皆係隨意對音故其字不同

予細思其義蓋西番語謂上曰

喇謂無曰嘛喇嘛者謂無上即漢語稱僧為上人之意

耳喇嘛又稱黃教蓋自西番高僧帕克巴

舊作八思巴

始盛

於元沿及於明封帝師國師者皆有之

元世祖初封帕克巴為國師後

復封為大寶法王並尊之曰帝師同時又有丹巴者亦封帝師其封國師者不一而足明洪武初封國師大國師者不過四五人至永樂中封法王西天佛子者各二此外灌頂大國師者九灌頂國師者十有八及景泰成化間益不

可勝紀 我朝惟康熙年間祇封一章嘉國師相巖至

今我朝雖興黃教而並無加崇帝師封號者惟康熙四十五年勅封章嘉呼土克圖為灌頂國師示寂

後雍正十二年仍其達賴喇嘛班禪額爾德尼之號不照前巖號為國師

過沿元明之舊換其巖勅耳黃教之興始於明番僧宗喀巴生於永樂十五年丁

酉至成化十四年戊戌示寂其二大弟子曰達賴喇嘛曰班禪喇嘛達賴喇嘛位居首其名曰羅倫嘉穆錯世以化身掌黃教一世曰根敦珠巴二世曰根敦嘉穆錯三世曰索諾木嘉穆錯即明時所稱活佛銷南堅錯也

四世曰雲丹嘉穆錯五世曰阿旺羅卜藏嘉穆錯我朝崇德七年達賴喇嘛班禪喇嘛遣貢方物八年賜書達賴喇嘛及班禪呼土克圖蓋仍沿元明舊號及定鼎後始頒給勅印命統領中外黃教馬蓋中外黃

教總司以此二人各部蒙古一心歸之興黃教即所以

安衆蒙古所繫非小故不可不保護之而非若元朝之

曲庇諂敬番僧也

元朝尊重喇嘛有妨政事之弊至不可問如帝師之命與詔勅並行正衙

朝會百官班列而帝師亦專席於坐隅其弟子之號司空司徒國公佩金玉印章者前後相望怙勢恣睢氣跋薰灼為害四方不可勝言甚至強市民物掙括留守與王妃爭道拉毆墮車皆擇不問並有民毆西僧者截手詈之者斷舌之律若我朝之興黃教則大不然蓋以蒙古奉佛最信喇嘛不可不保護之以為懷柔之道而已

其呼土克圖之相罷乃以僧家無子授之徒與子何異

故必覓一聰慧有福相者俾為呼必勒罕

即漢語轉世化生人之義

幼而習之長成乃稱呼土克圖此亦無可如何中之權巧方便耳其來已久不可殫述孰意近世其風日下所生之呼必勒罕率出一族斯則與世罷爵祿何異予意以為大不然蓋佛本無生豈有轉世但使今無轉世之

呼土克圖則數萬番僧無所皈依不得如此耳

從前連輪

喇嘛示寂後轉生為呼必勒罕一世在後藏之沙卜多特地方二世在後藏大那特多爾濟丹地方三世在前

藏對隴地方四世在蒙古阿勒坦汗家五世在前藏崇
寨地方六世在裡塘地方現在之七世達賴喇嘛在後
藏托卜扎勒拉里岡地方其出世且非一地何況一族
乎自前輩班禪額爾德尼示寂後現在之達賴喇嘛與
班禪額爾德尼之呼必勒罕及喀爾喀四部慈供奉之
哲布尊丹巴呼土克圖皆以兄弟叔姪姻婭遞相傳服
似此掌教之大喇嘛呼必勒罕皆出一家親族幾與封
爵世職無異即蒙古內外各扎薩克供奉之大呼必勒
罕近亦有各就王公家子弟內轉世化生者即如錫呼
圖呼土克圖即係喀爾喀親王固倫額駙拉旺多爾濟
之叔達克巴呼土克圖即係阿拉善親王羅卜藏多爾
濟之子諾尹綽爾濟呼土克圖即係四子部落都王拉
什燕石勒之子堪卜諾們汗扎木巴勒多爾濟之呼必
勒罕即係圖舍圖汗車登多爾濟之子似此難以枚舉
又從前哲布尊巴丹呼土克圖圖寂後因圖舍圖汗之
福晉有娠衆即指以為哲布尊丹巴呼土克圖之呼必

勒罕及彌月竟生一女更屬可笑蒙古資為談柄以致
物議沸騰不能誠心皈信甚至紅帽喇嘛沙瑪爾巴垂
涎扎什倫布財產自謂與前輩班禪額爾德尼及仲巴
呼土克圖同係弟兄皆屬有分唆使廓爾喀滋擾邊界
搶掠後藏今雖大振兵威廓爾喀畏懼降順旬請命
若不為之剔除積弊將未私相授受必致黃教不能振
興蒙古番衆猜疑輕視或致生事是以降旨藏中如有
大喇嘛出呼必勒罕之事仍隨其俗令拉穆吹忠四人
降神誦經將各行指出呼必勒罕之名書簽貯於由京
發去之金奔巴瓶內對佛念經令達賴喇嘛或班禪額
爾德尼同駐藏大臣公同簽掣一人定為呼必勒罕雖
不能盡除其弊而較之從前各任私意指定者大有間
矣又各蒙古之大呼必勒罕亦令理藩院行文如新定
藏中之例將所報呼必勒罕之名貯於雍和宮佛前安
供之金奔巴瓶內理藩院堂官會同掌印之扎
薩克達喇嘛等公同籤掣或得真傳以息紛競

去歲廓

爾喀之聽沙瑪爾巴之語剽掠藏地已其明驗雖興兵
進勦彼即畏罪請降藏地以安然轉生之呼必勒罕出
於一族是乃為私佛豈有私故不可不禁茲予製一金
瓶送往西藏於凡轉世之呼必勒罕衆所舉數人各書
其名置瓶中掣籤以定雖不能盡去其弊較之從前一
人之授意者或略公矣夫定其事之是非者必習其事
而又明其理然後可予若不習番經不能為此言始習
之時或有議為過興黃教者使予徒泥沙汰之虛譽則

今之新舊蒙古畏威懷德太平數十年可得乎且後歲

煽亂之喇嘛即正以法

呼上年廓爾喀侵掠後歲時仲巴呼土克圖既先期逃避而大喇

嘛濟仲扎蒼等遂托占詞為不可守以致眾喇嘛紛紛逃散於是賊匪始敢肆行搶掠因即令將為首之濟仲

等至前歲對眾刺黃正法其餘扎蒼及仲巴呼圖克圖等俱解至京治罪安插較元朝之於喇嘛方且崇奉

之不暇致使妨害國政況敢執之以法乎若我朝雖護衛黃教正合於王制所謂修其教不易其俗齊其政不

易其宜而感眾亂法者仍以王法治之與內地齊民無異試問自帕克巴創教以來歷元明至今五百年幾見

有將大喇嘛刺黃正法及治罪者天下後世豈能以予過與黃教為譏議乎

元朝曾有是乎

蓋舉大事者必有其時與其會而更在乎公與明時會

至而無公與明以斷之不能也有公明之斷而非其時
與會亦望洋而不能成茲之降廓爾喀定呼必勒罕適
逢時會不動聲色以成之去轉生一族之私合內外蒙
古之願當耄近歸政之年復成此事安歲輯藩定國家
清平之基於永久予幸在茲予敬益在茲矣

十全老人之寶說

十全記既成因選和闐玉鐫十全老人之寶並為說曰
十全本以紀武功而十全老人之寶則不啻此也何言

之武功不過為君之一事幸賴

天佑劬劻歲局未加一賦而賦乃蠲四弗勞一民而民

收無萬

今收伊犁及回疆戶口豈止數千萬

祇或免窮黷之譏耳若夫老

人之十全則尚未全也蓋君人之職豈止武功一事哉

朱子曰一日立乎其位則一日業乎其官一日不得乎

其官則一日不敢立乎其位官者何職之謂也君之職

不能盡言況敢云盡其職乎未盡其職則十全老人之

寶不亦涉自欺與誇而增慚愧乎然老人之十全實更

有奢望不敢必以敬待

天佑者十全之武功誠叨

天佑矣則十全之盡君職或亦可以希

天佑乎夫適百里者半九十里予今三年歸政之全人不啻半九十而且如三十年之久矣是以逮七十而繫猶日孜孜以為箴至八十而繫自強不息以為勉則此可必不可必三年中敢不益勵宵衣旰食之勤益切敬天愛民之念虔俟

吳貺或允臻十全之境視三年誠如三十年之速幸何
如之企何如之惕何如之是為說

御製文三集卷四